

समे – 12:25 hrs.

<><><><><><>

Jammu Results

भारतीय जनता पार्टी नै जम्मू खिते दिएं दौनें सीटें पर जित्त हासिल कीती ऐ। भारतीय जनता पार्टी दे मेदवार ते मौजूदा सांसद डॉ. जितेंद्र सिंह होरें कांग्रेस दे मेदवार चौधरी लाल सिंह होरें गी हराया। डॉ. जितेंद्र सिंह होरें लाल सिंह होरें गी लगभग सवा लकख वोटें कन्नै हराया। जम्मू संसदीय सीट थवां मौजूदा सांसद जुगल किशोर शर्मा होरें कांग्रेस दे मेदवार रमण भल्ला होरें गी इक लकख 31 जहार 540 वोटें कन्नै हराया। उधमपुर ते जम्मू लोकसभा हल्के थवां सांसदें उप्परोतली त्री बारी अपनी-अपनी सीटें पर जित्त दर्ज कीती ऐ। डॉ. जितेंद्र सिंह होर उधमपुर लोकसभा सीट पर 2014 ते 2019 च बी जित्त दर्ज करी चुके दे न। जितेंद्र सिंह होरें गी 5 लकख 71 जहार 76 वोट हासिल होए जिसले कि लाल सिंह होरें गी 4 लकख 46 जहार 703 वोट थहोए। डी.पी.ए.पी दे मेदवार जी.एम सरूसी होरें गी 39 जहार 599 वोट हासिल होए। ताई जम्मू थवां सांसद जुगल किशोर शर्मा होरें गी 6 लकख 87 जहार 588 वोट थहोए जिसले कि रमण भल्ला होरें 5 लकख 52 जहार 90 वोट हासिल कीते।

<><><><><><>

Kashmir-Results

लोकसभा चुनाएं दे कल घोषित नतीजें च नेशनल कांफ्रेंस नै दऊं लोकसभा सीटें पर अपना कब्जा बरकरार रक्खेआ ऐ जिंदे च श्रीनगर ते अनंतनाग आलियां सीटां शामिल न अजें कि

दऊं साबका मुखमंत्रिं नेशनल कांफ्रेंस दे उमर अब्दुल्ला ते पीडीपी दिं महबूबा मुफ्ती होरें गी हार दा सामना करना पेया ऐ। उमर अब्दुल्ला होरें गी लंगोट थमां विधायक रेही चुके दे ते आतंकवादिएं गी रपेया पैहा उपलब्ध कराने दे आरोप च एल्लै तिहाड़ जेल च बंद इंजीनियर अब्दुल रशीद शेख नै बारामुला सीट पर कोई 2 लकख वोटें कन्नै हराया। जिसलै जे महबूबा मुफ्ती होरें गी गुज्जर नेता ते नेशनल कांफ्रेंस दे मेदवार मियां अलताफ अहमद हुंदे हत्था कोई 3 लकख वोटें कन्नै हार दा सामना करना पेआ। एह दवै अनंतनाग राजौरी लोकसभा सीट लेई चुनां मैदान च हे। बारामुला च पेदे कुल 10 लकख 33 जहार 900 वोटें चा 4 लकख 72 जहार 481 वोट जेलै च बंद बकखवादी नेता इंजीनियर रशीद दे खाते च गे जिसले कि उमर अब्दुल्ला होरें गी 2 लकख 68 जहार 339 वोट थहोए। जम्मू-कश्मीर पीपल्स कांफ्रेंस दे सज्जाद गनी लोन 1 लकख 73 जहार 239 वोटें कन्नै त्री थारै पर रेह। तोआईं अनंतनाग राजौरी लोकसभा सीट पर नेशनल कांफ्रेंस दे मियां अलताफ अहमद होरें 5 लकख 21 जहार 836 वोट हासिल कीते। साबका मुखमंत्रि महबूबा मुफ्ती होरें गी 2 लकख 40 जहार 42 वोट थहोए ते नर्मी बनी दी अपनी पार्टी दे जफर इकबाल मन्हास 1 लकख 42 जहार 195 वोटें कन्नै त्रीए नम्बरै पर रेय। मियां अलताफ इक प्रमुख गुज्जर नेता न जेड़े गांदरबल जिले दी कंगन विधानसभा सीट परा केई बारी विधायक चुने जाई चुके दे न। श्रीनगर सीट पर नेशनल कांफ्रेंस दे आगा सैयद रूहुल्ला मेहंदी 3 लकख 56 जहार 866 वोट लेइए जेतु घोषित कीते गे जिसले जे पीडीपी मेदवार वहीद उर रहमान परा होरें 1 लकख 68 जहार 450 ते अपनी पार्टी दे मोहम्मद अशरफ मीर होरें 6 जहार 594 वोट हासिल कीते। पिछले 22एं बरें च अब्दुल्ला हुंदी एह पैहली हार ऐ, जिसलै जे 65एं बरें दी महबूबा मुफ्ती

होरें गी उप्परोतली दुई बारी हार दा सामना करना पेआ ऐ। उआं ओह 1999 च बी लोकसभा चुनां च हारी चुकी दियां न। जम्मू-कश्मीर च असंबली चुनां जेहड़े मेद कीती जा रदी ऐ जे इस बरे सितंबर म्हीने तगर कराई लैते जांगन, ओदे कोला पैहले दऊं साबका मुखमंत्रिं दा हारना केईं सोआल पैदा करा करदा ऐ जे जम्मू- कश्मीर दी चुनावी बिसात केहड़ी बक्खी जाग ते इनें नेताएं दा सियासी भविक्ख केहू होग।

<><><><><><>

L.S Round up

बीजेपी दी अगुवाई आले गठबंधन एनडीए नै 2024 आले लोकसभा चुनाएं च बहुमत हासिल करिए 292 सीटां हासिल कीतियां। लोकसभा दी सारी 543 सीटें दे नतीजे घोषित करी दिते गए न। बीजेपी नै 240 सीटां जितियां, तेलगु देशम नै 16 ते जेडीयू नै 12 सीटां हासिल कीतियां न। आई.एन.डी.आई गठबंधन गी 233 सीटां हासिल होइयां ते होरनें गी 18 सीटां थोइयां न। कांग्रेस नै 99 सीटां जितियां, समाजवादी पार्टी गी 37 सीटां जिसले कि तृणमूल कांग्रेस गी 29 ते डीएमके नै 22 सीटां जितियां न। उत्तर प्रदेश दी 80 संसदीय सीटें दे नतीजे घोषित करी दिते गए। समाजवादी पार्टी नै 37 सीटां जितियां, बीजेपी गी 33 सीटां थोइयां, कांग्रेस गी 6, राष्ट्रीय लोक दल नै 2 सीटां जितियां न। जम्मू ते कश्मीर दी 5 सीटें चा बीजेपी ते नेशनल कांफ्रेंस नै दो-दो सीटां जितियां जिसले कि इक सीट आजाद मेदवार नै हासिल कीती। जितने आले मुख मेदवारें च प्रधानमंत्री नरेंद्र मोदी, गृह मंत्री अमित शाह,

लोकसभा स्पीकर ओम बिरला, अर्जुन राम मेघवाल, बाजेंद्र शेखावत ते ज्योतिरादित्य सिंधिया जिसले जे हारने आहलें च केंद्री मंत्री अर्जुन मुंडा ते स्मृति ईरानी प्रमुख न।

<><><><><><>

NDA-INDI BLOCK MEET

प्रधानमंत्री नरेंद्र मोदी हुंदी अगुवाई च केंद्र च अगली सरकार बनाने बारे सलाह-सूत्र करने लेई अज्ज दिल्ली च एनडीए दी बैठक दा कार्यक्रम ऐ। इस बारे मीडिया कन्नै गल्ल करदे होई लोक जनशक्ति पार्टी दे नेता चिराग पासवान होरें आखेआ जे केंद्री गृह मंत्री अमित शाह होरें उंदी पार्टी दी कारकरदगी लेई उनेंगी ममारकबाद दिती ऐ ते आखेआ ऐ जे बुधवारें एनडीए दे सारे दल बैठक लाइए अग्गे दी रणनीति पर सलाह-सूत्र करडन। तोआई, आई.एन.डी.आई ब्लाक दी बी अज्ज संज्ञा बैठक लग्गा करदी ऐ। एह बैठक मेद ऐ जे कांग्रेस दे राष्ट्रीय अध्यक्ष मल्लिकार्जुन खड़गे हुंदे घर लग्गोग।

<><><><><><>

World-Environment Day

अज्ज विश्व पर्यावरण दिवस ऐ। एह ध्याड़ा लोकें च पर्यावरण दे बारे च जागरूकता पैदा करने ते पर्यावरण सरबंधी चुनौतिएं ते खतरे गी उजागर करने दे मकसद कन्नै मनाया जंदा ऐ तां जे इंदे बक्खी तवज्जो दिती जाई सकै। पर्यावरण दी रक्षा बारे जागरूकता गी लेइए संयुक्त राष्ट्र दे नेतृत्व च एह इक कुल संसारी सतह दा आयोजन ऐ जेहड़ा हर बरे 5 जून गी मनाया जंदा ऐ। इस दिन दी शुरूआत दा फैसला संयुक्त राष्ट्र महासभा आस्सेआ 1972 च लैता गेआ

ते 1973 च अज्जे दे रोज एह ध्याड़ा विश्व पर्यावरण दिवस दे रूपे च मनाय गेआ। राष्ट्रपति, उपराष्ट्रपति ते प्रधानमंत्री नरेंद्र मोदी होरें लोकें गी पर्यावरण दे संरक्षण लेई जागरूक ते जिम्मेवार बनने लेई आखेआ। राष्ट्रपति द्रौपदी मुर्मू होरें लोकें अगगे आह्वान कीता ऐ जे ओह मिलिए इस बेहतर ते हरी भरी दुनिया दे निर्माण लेई कम्म करन। उपराष्ट्रपति जगदीप धनखड़ होरें इस मौके शुभकामनां दिंदे होई आखेआ जे मनुक्खता ते कुदरत बश्कार इक तालमेल गै इक टिकाऊ जीवन दी बुनियाद ऐ। प्रधानमंत्री नरेंद्र मोदी होरें बी पर्यावरण दिवस दे मौके पर “पेड मां” नां कन्नै इक अभियान दी शुरूआत कीती। इस मौके उनें बुद्धा जयंती पार्क च अज्ज इक बूहआ बी लाया।

<><><><><><>

NTA

नेशनल टेस्टिंग एजेंसी-एनटीए नै नीट अंडर ग्रेजुएट म्तेहान दे नतीजें दा ऐलान करी दिता ऐ। म्तेहान देने आले विद्यार्थी अपने नतीजे exams.nta.ac.in/NEET पर जाइयै दिक्खी सकदे न। एह म्तेहान जंदी 5 मई गी लैता गेआ हा।

<><><><><><>

IMD

भारतीय मौसम विभाग नै औंदे 4-5 दिनें दौरान मुल्खै दे उत्तर पच्छमी हिस्सें च अंदी झक्खड़ ते गर्जी चमकिए बरखा बरने दे आसार दस्से न। जेदे नै गर्मी थमां दना राहत थोई सकदी ऐ, पर इस दौरान पूर्वी भारत ते उत्तर भारत दे बी केई हिस्सें च गर्मी दा प्रकोप दना घट्ट पर

जारी रेही सकदा ऐ। पच्छमी हवाएं च खोद्दल दे चलदे जम्मू-कश्मीर, लद्दाख, गिलगित, बाल्तिस्तान, मुजफ्फराबाद, हिमाचल प्रदेश, उत्तराखंड, पंजाब, हरियाणा, राजस्थान ते उत्तर प्रदेश च इस म्हीने दी अट्ठ तरीक तोड़ी 40 किलोमीटर फ्ही घंटे दी रफ्तार कन्नै अंदी-झकखड़ झुल्ली सकदा ऐ।

<><><><><><>